

四庫全書

集部

欽定四庫全書

集部

四溟集卷七至九

詳校官中書臣涂日煥

侍讀臣孫球覆勘

總校官知縣臣繆琪

校對官中書臣張曾效

謄錄監生臣潘河

欽定四庫全書

四溟集卷七

明
謝榛
撰

五言排律

送趙兵憲絅夫之宣府

曉發居庸道，征袍霜露侵。
揚旌度寥廓，吹角動蕭森。
殘月樓中嘯，青山馬上吟。
風雲占氣候，亭障足登臨。
狐嶺寒城斷，龍沙秋草深。
明王憂紫塞，戰士感黃金。
樽俎三

邊策烽煙獨夜心功成竟何處海上有丹岑

石佛廢寺

在居庸關彈琴峽之西

峽轉逢孤寺庭荒起暮煙石堂惟有壁松樹不知年劫
火關塵世名香斷勝緣登臨霜草地想像雨花天何處
飛馴鴿無由見老禪梵音泉自落法鏡月空懸淨土還
如此浮生重惘然門前車馬客誰復問青蓮

塞下三首

滿天秋氣動木葉下居庸銘墮征夫淚沙交戰馬蹤亂

雲連萬壘孤鴈度千峯迴合關城路馳驅塵土容山橫
邊色斷日沒野陰重朔吹翻旗影寒霜上劍鋒幾年頻
出塞百戰苦妨農廟畧今長畫軍儲日遠供檄書飛涿
鹿候火照盧龍會見旄頭落何人勒景鍾

二

青山行不斷獨馬去遲遲宿霧開軍壘寒城見酒旗沙
連天盡處霜重日高時慘淡兵戈氣蕭條榆柳枝乾坤
疲戰伐將相繫安危寄語籌邊者功名當自知

三

路出古雲州風沙吹不休烏鳶下空磧駝馬渡寒流地
曠邊聲動天高朔氣浮霜連窮海夕月照大荒秋擊鼓
番王醉吹笳漢女愁龍城若復取俠士幾封侯

送陳駕部邦禮出守潮陽

五馬辭郎署雙旌駐祖筵青山相別後黃鳥獨吟邊曉
色分江樹春風送楚船雲深嶺外路地盡海南天疊浪
平夷島高秋肅瘴煙蠻方俗化日郡閣政成年雨露三

農足歌謠萬里傳昌黎有遺廟千載尚依然

報國寺同馮戶曹汝言昆季餞別王太守學甫得

橋字

不盡送君意禪窓共昨宵離筵過風雨行旆及河橋黃
鳥鄉心劇青山驛路遙春陽浮郡滿雲物度江饒楚櫂
經千里吳歌自六朝清秋定相憶何處采蘭苕

陳太守元卿書至自鄴賦此答之

為郡經年別聲名自下車山川亶甲後風俗建安餘驛

路頻歸夢交情一報書孤鴻當晚落萬柳入秋疎月白
饒鄉思天寒滯客居陳蕃舊榻在今日為誰虛

寄王叔采

憶昔清洄上踟躕別右軍十年殊未見一字不相聞漂
泊應憐我迢迢幾夢君苦吟先白髮多病後青雲獨滯
周南日還空冀北羣飛花悵春過明月感秋分天外鶴
孤唳風前蘭自芬稚圭如舊識寧復北山文

送少司馬蘇公總制宣大

向曉發長安飛旌入渺漠南驅虎豹天上別鵷鸞一
薦膺推轂殊勲報築壇金鉦殷地響寶劍照人寒自古
邊庭計非今將相難龍韜開武庫麟閣待儒冠青海連
兵苦黃金結士歡論功多汗馬從事有材官漢檄雲中
度班銘石上看雄圖驃騎在一戰取樓蘭

送杞縣劉進士子旭使宣府

君才班馬流十度帝京遊聖代開奇璞春風脫敝裘長
思漢室計獨抱杞人憂擁騎馳邊郡揚旌拂戍樓霜連

涿鹿曉雲斷野狐秋地曠笳逾慘沙寒鴈不留壯心看
劍鏑屈指計刀頭千古儒生輩誰期定遠侯

同應駕部李太僕遊夾山

夾山不登眺勝事只空聞靈異開丹洞孤高入紫氛東
溟收地脉北斗控天文共有松蘿意聊從猿鳥羣持盃
駐嶺日吹笛破山雲更覓三花樹還期二使君

早遊盤山憩古公蘭若

薊門隨去住遊眺此身輕雲起千峯白泉流一澗清寒

沙餘馬迹初日散鴉聲恰自長林轉翻依峭壁行空中
孤磬落松下老僧迎碧玉開禪徑黃金作化城共言超
有象誰會入無生何必匡廬上遙尋惠遠盟

送張比部汝任募兵太原

拂曙別承明轡軒西北行天迴濁河水山擁太原城榆
塞霜中色蘆笳月下聲四愁今日最孤嘯幾時平慷慨
深酬主艱難始募兵良駒輕道路壯士重功名雲斷黃
花戍風連細柳營牙旗翻豹影寶劍奪龍精烽火當秋

急疆場計日清歸來上封事應悉九邊情

送程憲副子賓出鎮巴東

前尚寶卿
左遷戶曹

為惜同鄉別都亭醉酒危客星淹此地卿月感當時驛
道三秦轉春風萬里隨人逢山日少馬度棧雲遲曉色
迎吳劍晴空曳漢旗江長帶魚腹天迥出峨眉甲古應
多賦憑高獨遠思松深武侯廟草遍楚王池開府雄西
極銘鐘滿後期蠻方行自靖巴俗坐能移村女勤桑葉
歌童罷竹枝還教丙穴上雙鯉報相知

還峰卷為宋太守德完題

還乃返
朴之義

羣山高不極迴合越西城秋入雲根淨霜歸石耳清望
中分樹色空外落泉聲地接天台勝人含太古情林間
孫綽賦谷口子真耕處處煙霞動時時猿鶴鳴幾年守
真素一出見平生莫遣山靈謂應高黃霸名

暮雪集姜太史節之宅同包庸之賦

向夕變山川寒深歲暮天旌旗斷海戍煙火聚江船獨
鳥歸何後征人悵不前玉堂輝自動瑤闕燦相連酒訝

新豐貴冰增太液堅媚春殊可賦照夜迥堪憐留滯龍
門客逍遙鶴氅仙共看漢太史還為紀豐年

元日晏起書懷

輪蹄遍九陌此日獨高眠踈懶終何事飄零又長年地
寒疑臘在憲午覺春偏短杖閒中侶浮雲醉裏天昨孤
兒女望今復歲時遷起坐看明鏡蒼蒼鬢颯然

初春夜集王元美宅餞別吳峻伯徐汝思袁履善

三比部出使得孟字

共餞江南客芳筵候月來漏催詩草就春報燭花開把
袂終千里論心更一盃風人今夜聚星使幾時回官舍
遙聞笛宮庭暗落梅相看倍惆悵殘雪照燕臺

春夜徐進士子與宅餞別陳進士憲卿使楚

帝里論文夜從來哲匠能月邀金谷酒人對玉壺冰楚
調誰相和吳歌思不勝多情有徐幹何計挽陳登畫錦
懷湘浦春帆下竟陵涼秋聽過鴈望斷白雲層

送何吏部治象扶母櫬歸平陰

候火心仍北哀音夢已東斷腸自芳草揮淚向春風官
迹燕城久憂端漆室同海天低落鴈煙雨失孤蓬兵檄
關山外皇情宵旰中薦賢須此日還擬待山公

送中丞許公伯誠出鎮昌平

才名動海內白首華山阿閱世存涇渭逢時謝薜蘿幾
年懷趙壁獨醉發燕歌賦陋陰常侍功高馬伏波金鉦
傳鴈塞鐵騎渡榆河長嘯將平寇雄圖定偃戈春生千
嶂早雲傍七陵多應憶論文侶山城一鴈過

送歸參軍體之使居庸

參軍初奉使早發玉河隈雪盡關山路天低龍虎臺揚
旌海樹斷驅馬塞雲開曉色城頭月春聲笛裏梅沙場
莽迢遞亭障鬱崔嵬候鴈從南轉邊風自北來枕戈憂
國步草檄見君才擬待銘功日長纓繫敵回

送童侍御仲良謫羊城

把袂看春早天涯幾故知離歌初斷處遷客欲行時帆
度三江盡雲飛五嶺遲炎方殊物色秋水澹心期正氣

驚山鬼威名伏島夷瘴煙聊復酒海月尚堪詩地遠身
仍健官清俗可移羅浮春萬里還望早梅枝

春夜同玉峯禪師遊湖上

夜出招提境滄浪意不孤偶經花浦歇動有竹筇扶清
淨同禪侶疎狂信老夫暖沙閒白鳥春雨發青蒲樹斷
星垂野天空月滿湖摩尼珠獨在長此照虛無

妙應寺

殿宇獨嶙峋披雲興盆新重來布金地不見雨花人湖

近龍時出岩空鶴自馴
磬聲山正午草色路猶春
浩劫殊無極浮生會有因
可憐倦遊客空自老風塵

送顧尚書惟賢之南都

靈氣鍾吳會全才際聖明
管生知數早顧凱賦詩清
大策聞標柱雄談見用兵
功高海上戰威重日南聲
聽履猶霄漢移官豈帝情
中原愁裏斷北斗望邊橫
月白三江水山青六代城
磯看燕子在臺憶鳳凰鳴
雜佩兼蘭芷孤懷寄杜蘅
酬恩心轉切飛夢到燕京

夏日同李于鱗賈守準劉子成宗子相四比部南
溪泛舟

散步過林塘相隨上野航
沿流狎魚鳥嚼藕得冰霜
共擬西湖勝還乘北渚涼
桂樽移白日蘭櫂轉滄浪
楊柳緣堤合菰蒲出水長
酣歌意不盡曉色正蒼茫

七夕留別汪伯陽李于鱗王元美得知字

久客言歸計留連幾故知
鵲橋星度夜燕館月沉時
天上纔歡洽人間有別離
晴分絳河影秋動白榆枝
佳醕

還成醉萍蹤不可期年年湖海上今夕定相思

黃侍御協恭督學南畿賦此寄之

美人南國去建業路漫漫六代豪華歇三秋芳杜殘古
臺曾鳳下鍾阜自龍蟠雲度三江遠潮生白日寒文章
知道重品藻得人難側席天王意乘驄正北看

劉別駕宗周之潁州

客久敝貂裘吟詩徐庾儔之官千里別送爾一樽留赤
縣塵隨馬黃河霜滿舟堂開楚天月湖照潁城秋問俗

初臨郡憂時重倚樓
九邊疲餉四海劇誅求
世故聊長嘯君才豈
薄遊寶刀知有贈清
譽滿燕州

送沈參軍禹文奔喪吳中

清曉素車發歸心千里途
身方辭上國夢已落東吳
淮雨含悲切江雲入望孤
三秋驚浦鴈獨夜感檣烏
風木長鄰宅霜天低蘆湖
何當效徐孺遙為致生芻

送高伯宗梁公實二比部祭陵廟

祀典千年重嚴趨二妙同
馬嘶川日墮路轉石林通
旌

旆晴光外山陵王氣中雲深羅俎豆霜下肅臣工明月
帝靈在高秋天宇空瞻依增百感松檟正悲風

冬夜集張兵部茂參宅

秉燭坐深更嚴城亂柝聲寒雲雙闕迥夜雪萬家明世
事清樽盡邊愁白髮生匡時須計遠和敵竟功成自有
張衡賦誰憐李廣情劍塵時一拂莫遣暗龍精

送李侍御源甫奉使雲中諸鎮

柱史江南彥翩翩威鳳姿名從丹闕著才拔赤城奇霜

陌乘驄早寒燈草疏遲壯心驚物候憂色向邊陲直出
雲中道高飈雪外旗星連劍光動風助角聲悲實塞民
窮日屯兵歲杪時孤懷坐永夜擬報內庭知

送汪郎中伯陽出守北地

五馬衝寒色冰霜滿去程君王憂北地父老望前旌典
郡才方振防年計不輕河山分陝服形勢輔咸京樹隱
青蛇廟天空白豹城人家盡周俗羌笛半秦聲夜月登
樓嘯春風露冕行試看循吏傳終古定垂名

送俞別駕堯咨之臨清

吾郡本齊地使君當此遊東西抱河水表裏壯城樓臘
雪馬前盡春雲堂外流舟車兩京道賦役萬家憂和璧
才堪重度刀志未休素懷誰與會孤月照人秋

寄蔡衡州子木

聞道湘東勝偏宜遊宦情山川壯荆楚翼軫麗璣衡白
鴈夕連渚丹楓秋滿城樓高分嶽色地迥散江聲早歲
能為郡中原舊著名有才逢聖代不寐為蒼生驛使無

書札蠻方尚甲兵何時同醉賦上苑待春鶯

送庫部楊郎中守嚴州

共說新都勝今推良牧才揚帆征鴈盡領郡早梅開江
到桐廬合山從天目來雲寒伍胥廟月白子陵臺弔古
乘驂過行春露冕回長安懷舊好尺素幾時裁

寄塞上王侍御子梁

君王重簡命爾志在澄清節鉞分西顧風雲護北征羽
旗荒外合驄馬雪中行直渡桑乾水還臨驃騎營九關

多猛士百戰有長城
夜半仍傳檄天寒未解兵
黑山橫寶劍青海動
金鉦獨杖防邊策兼收
抗疏名虛心當國事
高議見儒生壯歲思
銘鼎空言陋請纓
乘秋推敵氣計日答
皇情應遣龍庭使
馳書到玉京

送王郎中學甫出守安慶

結緣殊增價飛黃早出羣
賢聲定曉國經術自河汾
竹馬來童子蒲鞭得使君
訟庭閒晚照官樹澹春雲
文物古今勝江山吳楚分
歌謠起清夜幾向月中聞

登遵化城樓

地道通遼海山嵐隱薊門登城秋草徧拂劍早霜繁清
切聞蘆管蒼茫見塞垣健兒屯北戍戰馬出中原羽檄
黃塵動牙旗白日翻窮邊思李牧異代感劉琨旅況聊
成賦戎機未易論從茲謝遊好歸卧舊山樊

歲暮寄盧次樵

客邸多朋好栖栖勞此生長存排難意遂有泛交情管
鮑心無改妻孥計轉輕單衣沾朔雪衰鬢滯燕城偃蹇

逢黃祖疎狂自禰衡家貧公議定歲久怨懷平共擬三
江釣還期五嶽行采芝從綺季回首謝浮名

送陸比部子韶決獄江南

西曹持漢律南使發吳吟落月嚴城早寒蟬別思深九
秋行肅殺萬木動蕭森帆下石頭夕雲連揚子陰榜人
偏利涉詞客重登臨為愛陸機賦悠悠千古心

十六夜同汪伯陽梁公實對月得求字

昨夜醉南樓西堂興未休共看九霄月仍是一輪秋影

傍關山落光連河海流盈虧本無定悲樂豈同遊肯負
琴樽雅還憐松桂幽顏顏空自感靈藥復何求

送楊太僕汝握奉使襄國

都亭罷祖席駟牡去駢駢世已多戎事民今半鐵衣山
秋萬木落天晚一鵬飛氣銳兵能勝年豐馬自肥邊庭
馳念切星月坐吟稀驛道滹沱外行看計日歸

雪中劉稽勲體乾宅賦此志別

雨雪逢殘歲長途斷客行翻空何脉脉到地故輕輕陰

接黃雲塞春歸紫禁城池憐寒玉淨樹訝早花明照夜
千山色因風萬戶聲卧袁真是懶訪戴亦多情寶劍靈
常動冰壺虛更清巨源能啓事嵇叔愛藏名郢曲今誰
和燕歌老自平試看東郭履還向鹿門耕

送謝給事汝學蜀中封王

客星入巴蜀使者下金閨軒冕離樽罷風塵去馬嘶王
孫重茅土天子錫桐圭地出函關外山通棧道西衣裳
沾雪冷旌旆拂雲低樹斷分金馬江清見石屏獨臨諸

葛井還泛浣花溪異世懷張載應留劍閣題

送彭明府子殷謫留都教授

故人三月宰即有薊門行握手驚相問當樽氣未平
醉懷多舊感別賦更新成野色浮雲闊春流去櫂輕
日斜桃葉渡潮起石頭城江上孤吟處天涯兩謫情
官閒疎世事地勝助才名豈待臨宣室今王召賈生

九月七日遊佛山同薛子喬闔達夫許克之賦得

黃字

登高待重九風雨恐相妨預約來金地遲留坐石牀一
樽乘野興同賦攬秋光天迥雲全白山空樹半黃風聲
寒颯背日色晚蒼茫老病偏多感躋攀且自強片言干
氣象千載見文章海右諸名士深知謝客狂

贈史中丞文直

千載東南計三秋戰守功陣雲回氣色匣劍閉雌雄往
事長歌外流年高卧中風霜惟勁竹江海一冥鴻薄俗
懷巢父幽期得阮公醉來論世故謬許老夫同

宋德完轉海南方伯詩以寄懷

君才今宋玉絕代有清標官自西江轉名同南斗遙揚
旌天欲盡度嶺瘴全消象郡通山勢羊城壓海潮春前
花競發霜後葉遲凋無復悲秋意登臺望赤霄

上洛中大司馬王公壽篇

瀍澗抱王城嵩高壯漢京河山元地勝靈秀自天生才
逸青雲早功多白髮盈薊門曾選將秦塞久知兵月曉
尚書省霜嚴驃騎營艱虞扶國步宵旰見皇情身豈風

塵倦心猶冰蘖清廟廊千載計柱石兩朝聲不負煙霞
侶彌堅松桂盟周田安舊業洛社聚耆英
公與洛下
八賢結社
醉新詩健能書老眼明棲遲耽綠野恬澹愛黃精已脫
升沉世應藏著述名三秋攜杖出二室擬丹成忽下浮
邱鶴還聞子晉笙當樽話寶訣夜色正參橫

朝歌留別蔡侍御

旅客承三顧軒車忽再過老年知自懶古道信無多春
動雲千里天寒鳥一柯下交松栢久中感歲時和未定

青山計聊為白石歌身雖各燕趙心豈限關河世事堪
高枕邊籌定偃戈有懷裁尺素早晚到煙蘿

寄楊明府子庸時應辟北上

聞道辭花縣因風寄短吟虛懷惟片月行色有孤琴父
老別時淚郎官到日心都城向晚肅御水入秋深霜冷
催南鴈天高接上林薦書應不負霄漢聽來音

秋夕張少參文輝劉僉憲仲安舟發塌河埭望有
作

作賦張平子能文劉孝標空憐此明月不得共清宵一
水流何急雙帆去漸遙秋光雲淡淡風色樹蕭蕭沁浦
期高興蘇門擬勝招齊名鎮河朔歌頌到漁樵

哭晁太史君石墓

多士期東閣孤懷向北辰名高太史筆病劇長卿身匡
世天何奪憐才誰更真茫然隔氣象遽矣失經綸白舫
雲隨觀清秋月寫神半生餘著作萬事已荆榛策杖來
何晚臨風愴獨頻尚思排難處一諾定交晨

同為盧
枏釋寃淚

濕墓前土心通泉下人明年花自發猶似玉堂春

程總制信夫東歸賦此寄懷

臨清人名
軌號古川

六遷皆陝服驄馬昔飛霜節鉞威西極煙塵靜朔荒邊
愁歸後少詩興老來長退是完名策閒為却病方片雲
隨去住二水合蒼茫野樹蕭蕭色秋花淡淡香有杯延
故舊無意話行藏何事伏波叟驅馳瘴癘鄉

寄李子田張子維胡懋中三內翰

久違三太史何日覩清標帝里書難達雲山夢豈遙玉

堂頻促席紫陌更連鑣風雅流元氣賡歌起聖朝人間
傳白雪仙路共青霄

癸丑同榜

幾見燕霜下偏驚御柳凋明

光草詔處長樂度鐘宵信是非凡骨應期王子喬

寄懷戶部翟員外十韻

大雅昔同社為郎書報遲黃花寒自發白鴈夕何之邊
餉烽煙處中懷鼓角時山林憂共繫歲月道相期聊取
浮生醉寧求異代知家無步兵酒世有嗣宗詩計部勞
心力功臣重鼎彞乾坤吾老矣霜露自淒其漢室存元

氣漳流寄遠思風胡今不見龍劍失雄雌

寄贈謝竹亭公子

同宗自何代安石越中家麗水散金色藍田分玉芽飛
揚君可羨疎懶自堪嗟棋進馳心遠詩成寄興賒月高
燕市酒春滿沁園花

沁水在懷慶城西

遙想鳴珂處翩翩白鼻

騮

酬楊萬壑茂才見寄山川圖并詩

畫逼輞川工王維信可同雲微天若遠石斷水如空裂

素寫能盡披圖意不窮相知萬里合相望一書通神會
江天月名傳海嶽風君才變化裏吾道寂寥中猿鶴交
年久漁樵化歲豐懶時猶蔣詡聖代豈揚雄地勝閒多
賦山靈暗有功寒暄依古栢霜露感秋蟲養拙聊幽事
探奇奈老翁丹書長在壁逸興滿蒿蓬

邊警寄張太史子維

學士別來久殘年嗟轉蓬悲秋心獨苦乘月夢相通起
對霜林白驚看烽戍紅老懷生事定時議野夫同世故

浮沉裏天機浩渺中黃金馱上國赤子悵西風斬馘邊
人淚馳驅漢將功董狐今史筆此意託孤鴻

登代州城樓望老營堡有感

寒色浮城上遐荒盡目前南雲接汾晉東路轉幽燕烽
舉兵威振冬來殺氣連烈風邊馬亂斜照漢旌懸諸將
寧無術三軍更可憐黃昏出鬼火白日斷人煙實賴中
朝盛還期衆壘全死生多為國賞罰本由天擒賊吾聊
爾憑高此悵然感懷空佇立枯木下烏鳶

冬夜劉伯東官署同謝侍郎楊總制吳郎中王計

部宴集

浩氣乾坤迥孤懷歲月遲
龍荒天盡處鴈塞臘殘時
凍澁莓苔徑寒凝冰雪池
雲山成慘澹霧樹隱參差
醉後寧無感歌中別有悲
雅交應道合僻性復誰知
客久頻歸夢年衰幾會期
相逢不披豁何以重遐思

寒食背郭園宴集同孔文賦

招攜多勝事幽僻斷囂塵
水學蘭亭轉園開金谷新
山

川昭代賦令節異鄉人
傾蓋相知定當杯各見真鴉啼
樓角暝花隱洞庭春
正欲標奇絕從教客過頻

寄懷王主簿兆期

憶昔探岩壑行吟春雪中
松門隨意歇石鏡照心同
聯榻期仍擬回驂興未窮
一樽留謝朓萬卷比揚雄
鶴轉風塵下鸞棲枳棘叢
于今翻百感猶自限西東

寄馮大參汝言時督餉平陽

京國分襟後鄉園把酒邊
風塵相並馬星月共浮船
久

重掄才日頻勞入計年心懸漢轉餉身歷晉山川黃葉
許由樹丹霞姑射天乘秋多勝迹弔古幾新篇羈客何
哀矣停雲獨悵然有情皆是累寄語故人前

冬夜過順軒昆季因述病懷得峯字

病多違舊社一訪正昏鐘豈奈形骸苦寧辭藥餌重雅
交隨去住老計轉疎慵寒夜惟殘月霜天有勁松逃名
竟損鶴閱世且魚龍昨夢尋真處雲深太華峯

暮雪過雲洲書屋賦得開字

迢遞同雲暝翩翩策馬來山城萬戶閉風雪一樽開幽
徑迷孤鶴疎林訝早梅微聲寒簌簌遠色夕皚皚客子
勝遊地王孫能賦才剡溪昔乘興何事櫂船回

冬夜北園同社中諸丈賦得宵字

園亭可避俗逸興邇來饒共結歲寒侶那辭風雪招棲
真豈蓬島終古幾松喬幽事堪頻數閒心自寂寥賦多
形勝地身老聖明朝我亦楚狂輩高歌同此宵

吳太守明鄉入覲見訪時客晉賦此奉答

昔別都亭柳垂條幾度新獨辭燕趙路相和楚陽春老
去鰲魚涸時來尺蠖伸中丞遠意切上黨故情親延士
堪為主移家豈在人漁樵今自適龍鳳古誰馴地得知
音侶天留報德身有期孤釣渭多事負耕莘西極連三
晉南雲望八閩海霞疑振藻江月恍交神客阻關山暮
鴉啼風雨晨鄴臺停五馬空復訪綸巾

寄陳雨泉方伯八韻

滇南亦何幸萬里得吾師海上鴈飛早吳中書報遲意

深元兩見交澹永相知久別各風雨端居聊歲時霜柑
春釀熟野館故人期稅畢門常淨郊行杖每持月留鶴
市景松偃虎丘枝何處藏神劍靈光復為誰

四溟集卷七

欽定四庫全書

四溟集卷八

明 謝榛 撰

七言排律

寄李槐亭鴻臚卿

曾使琉球旌節還祇憑忠信渺茫間
濤聲蕩舶無寧夢 寶氣凌空亦慘顏
直向島夷通漢詔回看閩樹即燕山
不知幾犯蛟龍窟自喜仍隨鴈鷺班
海外壯遊名獨著

朝中厚祿意常閒祀天無復勞憂思

祀縣人

官舍秋花醉

裏攀

秋夜張太史仁伯宅留別得情字

仙郎邂逅鳳凰城不奈悲秋客子行下榻一宵期盡醉
隔江三載媿知名當尊意氣還他日把劍風塵任此生
旅鬢於今空浩歎詞人自古更多情黃金臺迺山雲度
白玉堂高海月明世事年來愁轉劇同懷祇有漢張衡
寄懷王鑑川少司馬總制

賀蘭山下陣雲橫，豈學終軍漫請纓。
壯士氣豪憑虎畧，材官謀定取龍城。
旌麾北轉無征戰，節制西連有重輕。
狐嶺摩空秋盡色，兔河蕩月古來聲。
風吹淒斷胡笳曲，天與恩威漢塞兵。
百將傳中誰並駕，兩朝功後自完名。
鼎彝入勒當昭代，韋布論交在雅情。
尚憶都門共杯酒，也曾義氣許狂生。

寄懷顧桂巖唐蕙菴陳筆山蕭儀庭四郎中

自古悲歌聚散情，索居那問著書成。
世多岐路心何向，

日有琴樽氣自平。鴻鴈夜寒投野渚。芙蓉秋色照江城。
飄蓬獨擬三臺賦。振藻誰齊六代名。戍卒戰來荒舊業。
島夷亂後苦蒼生。身居白下瞻依切。莫道天涯遠聖明。

雪夜過李于鱗宅適已醉卧因留宿作

雪天騎馬禁城隈。官舍中宵為我開。太白醉眠呼不起。
惠連賦就却空來。滿城朔氣侵人骨。試問宮梅幾枝發。
上苑寒生千樹雲。西山暗落三更月。起來風物重淒淒。
門外日高鴉亂啼。莫惜餘杯醉歸去。天街不畏踏春泥。

寄李吏部一元

停驂鄴下憶當時一夕論文識面遲
別後春花誰共賦望中秋鴈漫相思
青山自合陶潛醉白首纔逢鮑叔知
騷騷故憐筋力遠鳳凰寧恃羽毛奇
獨嗟歲月疎書札偶向風塵倒接罹
古劍通靈堪自佩明珠投暗豈無疑
天南舊侶同懷抱海內詞人各路岐
莫道雲霞多變幻建安風雅定吾師

送方子文下第歸臨清

少小同遊久別離相逢忽訝鬢成絲
風塵握手非當日物候驚心共此時
東閣寧論招士處上林還擬看花期
青山晚照行堪遠黃鳥春聲聽不遲
老去功名應自慰古來詞賦重相知
馬卿信有凌雲氣和氏無勞抱玉悲
會待神駒開道路且將靈劍混雄雌
幾人失意曾相送折盡都亭楊柳枝

送吳比部峻伯使豫章

詔下明光散玉珂西曹帝遣布陽和
江天遙向豫章去

春草還從吳會過沙帶曉雲飛鴈驚浪搖晴日見龜鼉
青蘋忽起騷人興明月常聞榜子歌彭蠡星光連劍動
匡廬秋色傍船多梅山縹緲空煙水徐孺招尋自薜蘿
四牡南行知不倦雙魚北寄定如何王程迢遞重回首
應憶春風別潞河

送馮駕部伯祥出守羊城

折柳踟躕傍御堤長亭回首夕陽西獨看芳草初成賦
相聚浮萍又解攜出浦櫂聲空外杳隔林帆影雨中遲

三江路盡煙嵐迥百越城高牛女低
日上火田鳴翡翠風翻炎海躍鯨鯢
尉佗舊俗還能化陶侃遺蹤可自題
共道掄才今代盛遙知為郡古人齊
行春露冕青山下父老爭迎五馬嘶

送朱太史象玄使襄府

舊識華亭陸士衡歲殘相別重含情
離筵日落天邊樹去路春浮雪外旌
探勝西南增遠思采詩江漢得遺聲
梅花遲客開湘浦桐葉封王下楚城
諸葛井空芳草合

羊公碑斷綠苔生青山千古應長嘯北望風雲是帝京
孝德頌寄上李石麓閣老

白頭宰相受封年黃閣辭歸孝獨全東海靈椿元氣盛
上林仙桂露華偏村翁每遇攜松釀水鳥相迎出稻田
綠野開晴留返照蒼峯疊秀帶浮煙端居已倦中原路
定策能清北塞天好築層樓高貯勅九霄日月看雙懸
寄贈張元洲中丞

百粵全功秉鉞威九疑秋色望中微娥皇斑竹心仍苦

虞帝蒼梧世已非
拔地丘陵新草莽
隔江風土舊京畿
三山並出浮嵐氣
二水分流蕩日輝
憶昔楚狂知自在
即今吳調和應稀
邇來章疏殊多補
臺下嚴趨幾芻衣

寄懷大司寇謝太東少冢宰林對山少司空汪遠

峯少司徒畢松坡少司寇王柱峯中丞張許東

諸公

遙望金陵幾大臣
聖朝先後各經綸
江南地得依龍虎
海內天教網鳳麟
雲白石頭朝寄意
月明揚子夜馳神

老狂自信懷沖澹驛使相逢問隱淪樹色三山吳苑路
雨聲萬里漢家春羣公北向嗟踈懶肯學文園賣賦人
寄懷鄒太湖逸人

天涯含淚染征塵喪事連悲萬里身幾歲山居應惜老
三秋田稅更憂貧獨安蓬蓽懸遊子每見亭臺易主人
翠壁放歌林屋曉黃柑釀酒洞庭春花間杖屨閒無客
湖上風濤暗有神舊侶總非丘隴隔自看月影倒綸巾
淫雨至中秋不絕有感

苦雨生寒攬敝裘移書遮莫滴牀頭謝莊難賦今宵月
宋玉還悲故國秋零落不香丹桂老團圓無影素娥愁
積陰迥敞千峯色亂響高奔萬壑流袁渚那堪空繫舫
匡牀何必更登樓欲橫鐵笛天壇上吹散重雲望九州
同程子仁守歲有感

歲盡邊庭鐵騎回孤城秉燭旅顏開亂離已過三關靜
生死相違幾處哀漸覺寒威今夜減可憐春色異鄉來
老年結伴青藜杖聖代逃名濁酒杯淮浦南通吳客櫂

漳河東繞魏王臺身緣留滯常同感書寄平安各自裁
憶昔京華更愁思笛聲吹落漢宮梅

李鴻臚仲白歸自成都賦此慰懷

每憐張儉一身多妻子相將奈爾何巫峽落帆燈外雨
岷江倚杖淚前波官微誰識寸心赤愁劇偏令雙鬢皤
賴有松篁同歲暮能依冰雪待陽和夢馳鄉路書難達
酒盡耶筒市再過時序頻驚蜀風土雲霞常憶晉山河
索居自惜殘年病混俗寧為古調歌萬里全生還舊業

太行佳氣鬱嵒峩

四溟集卷八

欽定四庫全書

四溟集卷九

明 謝榛 撰

五言絕句

江南曲

夾岸多垂楊
妾家臨野塘
手拈青杏子
不忍打鴛鴦

四景圖

野水明孤嶂
平蕪燕子低
日斜人策馬
酒旆杏花西

二

赤日臨山沼荷花氣獨清
一亭蒲葦合鸛鶴向人鳴

三

世事惟高枕窻含萬壑秋
片雲飛廣漠白鳥戀滄洲

四

籬落數竿竹梅花春不孤
草堂人獨坐風雪滿西湖

古意

山上採蘭花山下採蒲葉
露濕青羅裙良人不知妾

懷鄒子序

渺渺太湖水湖中多鯉魚故人時把釣應有北來書

鶯

何物傍春柳交交東復西班姬正愁思莫向漢宮啼

鴈

朝辭委羽山夕渡湘江水欲落更迴翔虞羅在深葦

二

結陣時南向楚雲千萬重相呼恐相失日墮九疑峯

三

冥冥見遠心向夕汀洲歇葦花風露清夢繞龍沙月

四

白日有閒意往來湘水濱非關愛梁藻臘月滿江春

麗情

郎住長干南妾住長干北醉騎白馬來簾下初相識

二

江上採紅芳歸來與郎遇一笑見心期西園刺桐樹

銅雀妓

漳水齧銅臺西陵罷歌舞娟娟臺上人恩怨俱黃土

都下別張志虞

十年今一見話舊却成悲共醉新豐酒天涯又別離

雜畫

古木上參天流雲下拂地山亭人不來老鶴自幽意

二

山木秋風高黃葉掃復墮落日照柴荆烹茶敲石火

三

月出秋山空素琴彈古曲故人招不來芳蘭為誰綠

四

手持黃竹竿獨釣煙江浦夜來不醉歸買蓑為秋雨

秋閨

慘澹風煙暮滄江老杜蘅所憂在遠道君重妾身輕

二

斜陽照短簷獨鵲鳴疎柳昨夜夢夫君船迴九江口

寓目

蒼松怪若虬秋草高於鶴倚杖獨無言庭寒曉霜落

宮詞

珠箔曉光寒楊花漫春雪牀頭紫綺囊中有同心結

二

南風吹藕花水殿思無賴日暮一枰棋妾輸白玉佩

三

紈扇已涼秋紅顏欲消歇夜深下玉階獨拜梧桐月

四

凍雪滿空階瑤宮但孤影燭下裁吳綾那知剪刀冷

相逢行

馬上誰家子相逢灞水頭片言合義氣笑贈千金裘

當壚曲

少婦試春衣當壚出素手五陵遊俠兒下馬一呼酒

公子行

簾外百花香金杯照春色對客罵奚奴不添鸚鵡食

遊天壇山

琳宮逼太虛石樹團清影
悵望白雲仙日沉九芝嶺

二

迤邐石壇西扶筇任幽討
秋高天宇清月照金光草

三

偶逢雙玉童相引躡雲去
犬吠洞門開三花最深處

四

仙老不知年相逢問九轉
袖中出寶書歷歷皆雲篆

五

金節蕩天風，瓊巖對海月。
會當驂白螭，飛向蓬萊闕。

大梁懷古

策馬夷門道，高城帶暮雲。
至今豪俠士，猶說信陵君。

初春夜同漫山方伯瓊泉將軍酌樓菴書齋

客子燈前酒，梅花雪後天。
不須橫玉笛，春意滿山川。

夜期賈道簡不至

呼童開玉樽，對此春庭月。
故人期不來，雲外清鐘歇。

春柳

嫩色含輕雨
柔絲弄早春
昏鴉棲欲定
腸斷未歸人

春暮

極浦晴雲澹
空林夕照低
菜花飛蛺蝶
春在石橋西

春興

夜月懸銀燭
春江湛綠醅
美人歌古調
爛醉百花臺

白髮嘆

落落風騷懷
無端易衰老
天涯又暮春
白髮對芳草

大伾山夜約李子庚不至

涼月照青蘿山亭坐深夕
放歌聊一杯待我同懷客

采菊

籬下黃金花幽人時復采
滿天霜露寒莫待秋容改

北園夏日

柴扉間永日穉子汲寒泉
院靜鳥雙下松涼人獨眠

白龍潭

浩歌秋水邊驚破白龍夢
明月落深潭疑是龍珠動

彈琴峽

石峽迸流泉琴聲自萬古坐賞夜無人空山月正午

潞陽曉訪馮員外汝言

海日上孤帆山雲交雜樹美人方曉眠更在林深處

二

野闊早霜明林空涼吹動一犬吠人來松窻破秋夢

梁武選公濟孝思歌

去歲望雲心東歸車馬疾君今向故園非復倚門日

二

慈顏隔杳茫西風益悲慟白楊空有聲不起九泉夢

三

履霜思已深對雪重悽惻竹筍為誰生寒林慘無色

四

望望蒿里門白雲最深處泉聲咽不休流下空山去

詠蟬

弱翅凌晨動繁聲向夕流不知風露裏還得幾何秋

宿崆峒山示梁道士

晚到崆峒山石欄時獨倚萬年空碧雲不見廣成子

二

名山多道流誰是還丹客東望金銀臺海天萬里隔

雪後同王希元登代州城樓

登城眺夕陽慘澹羣山色何許最關心愁雲在西北

二

睥睨遼天近登臨邊樹迷漢兵不到處寒鳥向誰啼

古意

無日不秋聲
新故愁相接
何當一夕風
盡彫千樹葉

二

青山無大小
總隔郎行路
遠近生寒雲
愁根不知數

春雪登樓有感

天垂樓外雲
雪變城中樹
何處不春寒
鴉啼又飛去

詠蝶

花盡忽飛來
豈待南風送
睡起笑相看
不知誰是夢

欄中花

雕欄花共倚蜂蝶亦來多一夕經風雨雕欄護幾何

鷺鳥

鷺鳥逐天風翻然窮海嶠詎保羽毛全清流試相照

羣雀

朝來羣雀鳴飲啄在咫尺謀生我太勞萬里長為客

集李園值雨得花雲二字

亭館初同宴煙蘿別一家依依簷際雀澹澹雨中花

二

名園時共賦物色兩平分
花潤不多雨山青無定雲

宿山店值雨

白白樓外雲蒼蒼
石上樹一杯仍復愁
卧聽西山雨

二

鄴中三十秋未識
太行路我來風雨多
無乃山靈妬

東園秋懷

地僻有長松
鶴閒非短翮
落落丈夫心
白頭幾人識

二

天寒聞落木葉葉是鄉愁敲窗作風雨不減去年秋

東園春感

西郭復東園尋芳結伴少何處不感懷春風幾黃鳥

二

春草青猶短牽愁爾許長天涯白首客獨立幾斜陽

登樓

朝亦登此樓暮亦登此樓白雲千里色不是故山秋

聞鴈

少年聞鴈聲老年聞鴈聲鄉心無老少何處最關情

秋閨

目極江天遠秋霜下白蘋可憐南去鴈不為倚樓人

二

月缺偏多感月圓翻自悲君看幾圓缺不異在家時

三

寒蛩兼夜雨併作枕邊愁天涯有苦樂兩地一般秋

四

無風落葉遲有風落葉疾秋聲時有無寧同郎在日

狼村

曾參回勝母墨翟避朝歌無限功名子狼村日暮過

春閨

阿郎久不歸春夜曠蘭室月在茶蘼西含情理瑤瑟

少年行

年少綠衣郎春遊鳳城下醉弄珊瑚鞭嗔人不避馬

玉階怨

夜色冷深宮麗人眠復起風生綠桂枝月落銀塘水

長相思

鬱鬱相思樹上有相思鳥相思人不來風雨愁多少

題席許北書亭

白白野雲暮青青階草春小亭間日月誰問著書人

四溟集卷九

欽定四庫全書

集部
四溟集卷十

詳校官中書臣涂日煥

侍讀臣孫球覆勘

總校官知縣臣繆琪

校對官中書臣張魯效

謄錄監生臣潘河

欽定四庫全書

四溟集卷十

明
謝榛
撰

七言絕句

登輝縣城見衛水思歸

城外河流白練長
城中萬戶共秋光
秋來偏作還家夢
河水東流到故鄉

古意

百轉轆轤金井深美人汲水梧桐陰流雲在天日將暮
獨有寒泉知素心

郎種菊花何遠離秋來花發倍相思玉京郎醉菊花酒
不見故園霜露枝

俠客行

曉來獨酌酒家樓擲下黃金不掉頭走馬西山射豺虎
風霜吹滿錦貂裘

公子行

京洛王孫日有期，千金買馬恨行遲。
隔花忽見遊春女，笑舉絲鞭問阿誰。

老將行

虬髯丈夫乘鐵驄，自言征戰老雲中。
憑陵仗劍出門去，原上枯桑鳴朔風。

塞上曲

秋生關塞曉霜飛，日上轅門探騎歸。
百戰將軍驚白髮，不知凋敝幾征衣。

旌旗蕩野塞雲開金鼓連天朔鴈回落日半山齊逐北
彎弓直過李陵臺

飛將龍沙逐北還夜驅駝馬入燕關城頭殘月誰橫笛
吹落梅花雪滿山

暮雲黯澹壓邊樓雪滿黃河凍不流野燒連山征馬絕
何人月下唱涼州

金笳曲

沙磧茫茫黑水流健兒六月換羊裘駝背上吹蘆管

風散龍荒作冷秋

碧眼名王貂鼠衣天寒走馬獵金微彎弓仰射雙鷗下
日晚穹廬帶雪歸

古怨

阿郎裘馬欲從軍空說邊庭有戰雲夜夜青樓買歌舞
愁人風雨不曾聞

九月雪

鴈拂同雲過戍樓菊花含凍不成秋迷茫夜擁金微路

未寄寒衣人正愁

冬夜聞笛

雪後寒雲散御隄
笛聲何處重淒淒
北風吹折邊城柳
人倚層樓月正西

送周秀才歸錢塘

燕京陌上送周郎
歸到西湖春草長
清夜開樽多舊侶
滿船歌管月如霜

少年行

燈下呼盧幾夜殘
今秋召募到長安
相期白刃清狐塞
要使黃金飾馬鞍

寄吳峻伯

仙帆曾約薊門遊
醉聽吳歌下碧流
千里雲山成寂寞
北風吹鴈到湖州

暮秋有感寄樂侍御孔原

別後封章天上聞
幾經秋草未逢君
于今漫憶樂巴酒

漢殿迷茫愁暮雲

是歲三
殿災

送鍾季烈奔喪豫章

郎官纔轉漢西曹
白舫歸心日夜勞
啼殺檣烏孤月慘
九江寒色起風濤

酬劉中丞道甫見寄

開府孤吟黃鳥邊
薊門相別幾華年
西南古道分三楚
江漢春雲共一天

寄武當山張隱君

辭官身寄楚天涯
石屋燒丹別是家
七十二峯春雪裏

杖藜隨意看梅花

雲岩深處獨逍遙
海鶴傳書昨見招
月下定逢王子晉
玉笙吹下摘星橋

夢張肖甫

素琴遙憶美人彈
夢到銅梁落月寒
江口蘋花忽相見
不知行路蜀中難

屈平

初著離騷去國年
獨醒懷抱轉淒然
汨羅不作西流水

終古愁雲在楚天

吳母太夫人哀詞

城上烏啼正夜分
歸魂遙逐楚江雲
故園春笋空成竹
冷雨淒風不忍聞

道院秋夕

秋河一帶月光圓
露坐空除夜欲闌
却訝西樓降仙子
玉笙吹徹萬家寒

鄒子序見過有感

湖上青山舊業存
橘花春冷白沙村
遙思社日鄰翁醉
燕子飛來空閉門

別調曲

家住鄴城門向西
青樓上與鄴城齊
郎行好記門前柳
春夢南來路不迷

木落天寒郎欲行
樽前離怨一鳴箏
燕姬纖手調新曲
不是西樓今夜聲

遠別曲

阿郎幾載客三秦
好憶儂家漢水濱
門外兩株烏桕樹
叮嚀說向寄書人

搥衣曲

秦關昨寄一書歸
百戰郎從劉武威
見說平安收涕淚
梧桐樹下搥征衣

春宮詞

笙歌長在玉樓東
月上千門春不同
莫怪畫圖欺漢帝
昭君何限老深宮

秋宮詞

內苑秋風木葉殘
班姬曾為賦齊紈
六宮何處無愁思
不斷陰蟲泣夜寒

桃花

溪上蒸霞千萬枝
隔林黃鳥願春遲
不催洞裏秦人老
解使宮中漢女悲

繡球花

高枝帶雨壓雕欄
一帶千花白玉團
怪殺芳心春歷亂

捲簾誰向月中看

紅梅

西方仙子服丹砂
幻作江天第一花
未合上林凝暮雪
偏宜大庾映朝霞

酬賈子修見寄

客子孤吟逼歲殘
停雲縹緲正西看
趙襄城郭千山外
一騎書來雨雪寒

漳河雨後

隔林明軋來漁舸白鷺背人飛不高却訝衡漳一夜雨
幾家村落生秋濤

訪葛徵君

西城閒訪葛洪家籬落秋餘白荳花高枕自知無俗夢
數椽茅屋在煙霞

暮秋溪上即事

秋深露冷荻花間沙岸無人鶴自還坐據清流一片石
西風不動釣絲閒

寄懷范堯卿

老來黃鳥更愁聞
兩度春風不見君
書到日南心萬里
碧雞山下有停雲

送張戶部道卿還省中

離筵歌罷動清飈
直北關河入望遙
日暮飛帆向天際
不知暗度海門潮

送吳二少陸歸洞庭山省親

遊子驚心歲暮歸
篋中時檢舊斑衣
白頭應念齊城客

其兄少呂
時客濟南
春動江湖鴈北飛

鶴髮相輝堂上人
吳天遙望瑞雲新
洞庭酒熟梅花發
同醉沙村幾樹春

遊蘇門山不果柬蔡侍郎

勝事良辰多偶然
蘇門蘿月客心懸
忽驚枕上來風雨
疑是空山聽百泉

春宮

花間御水照春心
幾處恩波自淺深
多少蛾眉爭買賦

相如應是厭黃金

寄文五峯

半醉吳歌何處遊
白雲寄意不勝秋
乘風欲落秦淮水
遮莫尋君傍酒樓

寄門人王少海秀才

歸去還從支道林
秣陵遊覽壯吳吟
雨花臺上談禪夜
水月虛涵妙悟心

晚登沁州城有感

蒼茫野色幾沙灘
漳水東流倚堞看
煙火滿城天向夕
一鵬飛過不知寒

客子登臨望野田
銅鞮城上月初懸
清光偏照農家婦
織得春衣辦稅錢

送徐進士子繩謫建陽少尹

長亭別酒見平生
越水吳山去國情
欲采江蘺何處泊
一帆秋雨聽潮聲

九霄宮闕絳雲垂
上有仙人謫武夷
三十六峯爭秀色

秋風莫負幔亭期

建溪城外有仙壇
梅福山空落月寒
不向清朝學仙尉
還依北斗望長安

望浙峯頭秋葉彫
望京樓上斷鴻遙
應思舊日看花處
走馬盧溝第一橋

九日潭空龍獨眠
三春雷雨建陽天
荔枝花發啼黃鳥
閩海迢迢望日邊

送劉將軍赴南都

江風吹櫂送人寒
一劍橫秋祇自看
應過淮陰弔韓信
月明曾照漢家壇

送陳駕部錫卿還錢塘省親

司馬旌旗下九重
三江秋色上芙蓉
故鄉南去四千里
雲外遙看天柱峯

朝浮揚子潮聲遠
夜泊蘆花月影孤
應念倚門今白髮
長風吹夢到西湖

白雲千里故園心
海上青山辨武林
燕鴈度江天渺渺

吳楓接岸日陰陰

片帆飛去拂雲霞月滿中秋應到家人在長安望南國
隔江春信寄梅花

秋懷

秋來客思渺煙波湖上看山秋更多祇恐佳人怨秋色
晚風吹斷采菱歌

送王夢白歸吳次韻

八月浮雲滿帝畿長江風送一帆歸
臯橋無限黃花酒

莫遣秋霜上客衣

朝度海門生白波天涯知己惜無多
清秋忽憶山中侶誰伴橫塘采芰荷

擊楫高歌氣不羣秋風吹落大江雲
黃金臺上初歸客白鷗橋西舊隱君

張翰東歸尚黑頭石湖重理舊漁鉤
不知人對燕山月笛裏梅花獨夜愁

烏棲曲

月出春江照芳芷思君夢度瀟江水花裏朱扉向曉開
雙雙蛺蝶正飛來

池亭獨坐愁落暉欲采菱荷製君衣一寄天涯當自悟
君身不染風塵色

送皇甫水部之荊州

聞道美人荆楚行片帆風色度江城夕陽欲下復何處
九十九洲芳杜情

襄陽小泊訪山公樽酒心期異代同江上楚聲聽不盡

銅鞮爭唱月明中

郢都南去渺煙濤遙憶風流何水曹日暮亂山秋色裏
采蘭應傍楚江皋

煙沙漠漠水淙淙估客千帆入漢江天畔高樓動秋興
白雲紅日坐開窻

大江千折蜀中來西望黃牛煙霧開知爾登臨最能賦
至今庾信有高臺

五嶽吟

海東黃鳥送書來欲上天門把玉杯萬壑風雲隨杖履
狂歌醉舞漢王臺

南嶽夫人寄紫芳清秋約我過衡陽祝融峯上踏歌去
二十五溪煙水長

漠漠秦雲望欲迷好乘鴻鵠過關西盤容鐵索三千丈
玉女峯頭日月低

恒嶽孤高天外看懸崖如削路盤盤夜來夢落通玄谷
白石蒼藤月色寒

汗漫中原逸興濃洛陽南去訪仙蹤
杖藜長揖浮丘伯
五色雲垂太室峯

塞下曲

都護防邊旦夕勞秋來天子賜征袍
何當淨掃黃龍塞
白日飛霜上寶刀

青海城邊秋草稀黃沙磧裏夜雲飛
將軍不寐聽刁斗
月上轅門探馬歸

窮邊寒日慘無光沙草連天走白狼
百戰健兒爭射獵

秋風躍馬黑山陽

風吹榆柳作寒聲
直北龍沙一望平
雲壓旌旗飛暮雪
將軍坐嘯受降城

朔雲黯淡古今愁
十月交河凍不流
鐵馬無聲關塞靜
征夫月下唱梁州

漠北詞

大漠蕭蕭黑水流
健兒七月換羊裘
駝背上吹蘆管
日暮長風動地秋

委羽山橫塞北天
學飛雛鴈夕陽邊
留犁歲歲無爭戰
白馬黃駝傍草眠

石頭敲火炙黃羊
邊女低歌勸酪漿
醉殺留犁不知夜
鷓鴣嶺下月如霜

曉開氊帳擁秋雲
鳴鏑揮鞭部落分
牧馬陰山莫南向
鴈門今有李將軍

碧眼賢王出打圍
角鷹欲下兔如飛
一瓢蘆酒驅寒色
雪滿西山夜不歸

譯使燕京納貢回春風相送過榆臺單于無事耽歌舞
夜敞穹廬海月來

春別曲

鷓鴣雙飛下野塘別情無那楚天長官橋柳外青驪馬
百尺遊絲送阿郎

大梁雜興

梁孝池臺迹已陳鄒枚去後復何人黃鸝百轉日西下
柳外長煙依舊春

獨登高塔俯中州一線黃河天外流
坐倚半空成浩嘯
白雲南去見嵩丘

三老遺蹤在吹臺好風華月為誰來
騷人意會千年上
半醉掀髯坐石苔

飛樓縹緲暮雲間上有紅妝竟日閒
遙望玉驄馳九陌
魏家公子射鵰還

梁國河山草樹空英雄異代氣相同
侯生慷慨無餘恨
獨立夷門嘯晚風

秋夜聞笛

天空月白見峯巒
橋下泠泠秋水寒
長笛驚迴老蛟夢
道人獨倚石欄杆

屈原

放逐孤臣淚滿纓
離騷當日寄深情
汨羅江上愁雲起
萬古蛟龍氣不平

昭君

龍荒夜半起悲風
坐悔容顏傲畫工
一曲琵琶殘月落

愁看孤鴈入秦中

春詞

雲鬟高結靚妝新
白玉屏開光照人
莫為桃花怨風雨
牡丹亭上有餘春

城烏何意夜深啼
紅杏梢頭片月低
香冷熏籠人不寐
春風吹過玉欄西

春閨

羅衣初試薄寒生
豈蕊花開感別情
零落鉛華君不見

畫樓春雨燕雙鳴

重九雨中懷弟

天空朔鴈不成行
秋色年年似故鄉
門掩菊花人獨卧
冷風疎雨過重陽

漁翁

青竹竿頭一釣絲
高風應與子陵期
夜深醉卧秋江上
夢繞蘆花明月知

漁婦

自嫁漁郎不解愁
月高橫笛楚天秋
江村楊柳渾搖落
何處佳人獨倚樓

送竇子南還

家住江南建業城
春風歸去片帆輕
鳳凰臺上重登眺
白日浮雲萬古情

古怨

邯鄲少婦美容光
嫁與燕京遊俠郎
白壁黃金買歌舞
不知風雨斷人腸

山中觀芍藥醉賦

山亭芍藥正花開
白石欄邊對酒杯
醉折紅芳還起舞
天風忽送彩雲來

宿香山

深夜無眠風露清
天移北斗坐間橫
幽人不作紅塵夢
月照空山鶴一聲

遊洪光寺

嶺外雲霞開暮晴
半天風落萬松聲
于今蓮社誰為主

遙望廬山無限情

聞簫

誰弄玉簫當晚風淒淒孌孌入高空
蒼梧月出鳳凰叫
千山萬山秋氣中

溪上雜興

日暮孤村買濁醪
滄浪歌罷興逾豪
蘆花如雪點秋水
白鷺背人飛不高

有客逍遙水石間
西風不動釣絲閒
渭川老子終多事

空外孤雲自往還

度齊嶺

石樹蒼蒼碧漢齊
日高荒野亂鴉啼
樵夫遙指天壇路
絕嶺重雲西更西

本公房

滿山寒色萬株松
天外遙傳日暮鐘
但見簷前起雲霧
不知鉢底卧蛟龍

雪中即事

萬里同雲鳥不飛出門寒色上人衣誰家公子能馳馬
雪滿長安射獵歸

送周秀才歸錢塘

美人南去采芳蘭春色偏宜江上看天竺峯頭讀書處
白雲長自傍人寒

塞上曲寄少司馬蘇允吉

海日高臨塞上城漢家諸將久屯兵斷雲飛去遼天闊
北望燕然萬古情

白登城上早霜淒黑水河邊暮鴈低
還憶去秋明月下
金笳吹過七陵西

邊柳蕭條帶落暉
長城北去是金微
健兒躍馬西山下
射得雙狼雪裏歸

孤月高高照朔荒
戍樓吹笛滿天霜
三秋楊柳飄零盡
此夜征夫總斷腸

牧馬深山白草中
不聞鼙鼓動西風
老兵閒坐斜陽裏
盡說今秋魏絳功

鴉啼初日塞門開
昨夜陰山探騎回
秋盡漠南風雪徧
單于不敢射鵰來

傷沈夷齋參政

宦臣垂老付滄洲
八詠曾題江上樓
瑤瑟無聲詞客散
祇餘松檟片雲秋

寄周木涇方伯

金馬山晴吐翠嵐
洞庭春酒憶黃柑
文章自出吳中格
不盡雲霞耀日南

送張少尹元文還任新喻兼寄李明府伯承

羣玉峯頭華月低
九仙臺上白鸞棲
乘秋欲借王喬履
一夜高飛吳楚西

送張憲副叔載鎮巴東

風吹朔鴈感離人
日下燕山望去塵
白髮遙憐庾開府
滿天秋色過三秦

驅馬西行劍閣開
卽今重見勒銘才
吟秋月照三巴水
弔古風生八陣臺

同陳廣文蓋卿飲王學孔園亭

亂樹高亭駐落暉
鵲絃慢撥羽觴飛
古今多少風騷客
誰向花前不醉歸

秋閨

棠梨落葉滿園秋
門掩蛩聲入夜愁
未寄征衣霜露冷
夢魂先到古雲州

李子仁書屋

蒼林白屋滿牀書
山送秋雲到廣除
鳥雀不驚人對酒

一簾松月夜何如

東李之茂

夢回彷彿甕頭香猶憶君家醉玉觴
起向花庭吸清露不知殘月笑人狂

次南岑丈雨中見懷韻

燕趙長歌調自悲山城搖落嘆歸遲
夜深孤劍龍光動風雨鳴窻不寐時

晚登林慮城

山抱孤城四壁青
雲沙煙草夕冥冥
半天舒嘯月東出
好醉美人雙玉瓶

郭壽卿園同申伯憲牛國禎諸君吟酌

蒼涼海日上亭臺
無數幽花帶露開
人在萬山秋色裏
白雲低傍酒樽來

即席贈薛之翰

園花樽酒日相期
共爾留連欲暮時
醉倚山亭歌楚調
秋螢飛過石榴枝

宿山家

空山茅屋夜遲遲
促織啼寒欲訴誰
少婦燈前事機杼
秋風花盡木綿枝

暮雨登圓通閣望鄴城有感

傑閣移時傍赤闌
楚雲東望轉迷漫
太行不隔中天雨
遙憶柴荆共暮寒

雲壓山城雨不休
閣中遙起故園愁
漳河東去蒼茫色
猶似三臺醉裏秋

次孔丈對花二韻

桃樹有花春可憐
醉歸猶望洞門前
美人不得分明見
咫尺空濛隔暮煙

林亭漫興

野樹青青布穀啼
更看蝶繞菜花畦
今宵不盡名園興
夢落蒼茫水竹西

寄曹中丞

一自西河別孔融
楚天詩興復誰同
青荷漸長黃梅熟

人在江樓細雨中

送高生歸吳

客中多病素琴孤
季子黃金更有無
花滿江城春正好

一帆煙雨下姑蘇

春怨

紫綃揮斷淚闌干
窻下秦箏獨自彈
三月梨花風又雨
小樓燕子怯春寒

春宮詞

鸚鵡喚人池殿東
花開曉日照金籠
繡簾不捲春將暮
懶向重堦掃落紅

秋宮詞

桐葉滿堦秋思多
深宮玉輦幾時過
西湖還駕黃龍舫
日暮遙聽瓠子歌

茜紅衫子鬱金裙
玉貌燈前坐夜分
漢帝如何誅畫士
六宮猶自有昭君

太液池東明月高
侍兒和露摘蒲萄
秋來不敢題紈扇

宣室于今萬事勞

院院黃花秋色濃
幾看青鏡惜芳容
瓊窗忽夢金輿過
長樂霜寒五夜鐘

採蓮曲

家近城西綠水塘
荷花開落幾悲傷
採蓮遙寄阿郎去
妾抱苦心終為郎

聶政墓

軼里空餘鳥雀愁
依然落日對荒丘
丈夫一諾輕生死

浩歎風前萬木秋

阮籍墓

涼秋白露滿芳蓀無限窮途舊淚痕
千古狂歌誰會意
西風原上弔詩魂

酬方子文見寄登岱之作

風騷誰繼鮑參軍浩唱凌秋碧落聞
獨秀峯頭閒對酒
月華高出海東雲

秋暮登九龍山

興來攜酒一登攀
滿徑秋花照客顏
醉舞天風人不見
白雲飛度九龍山

元夕

此夜歡遊白晝同
六街車馬度春風
絲簧聲動僊人館
燈月光連帝子宮

宮詞

自入長門空繡帷
玉顏非復鏡中時
梨花夜雨燈相對
燕子春寒君不知

曉起慵妝眉黛殘玉堦芳草捲簾看花間漫撲雙蝴蝶
宿露偏沾翠袖寒

采蓮曲

湖上西風吹綺羅靚妝越女照清波折將蓮葉伴遮面
擢過前灘笑語多

雨中集王文父別墅登樓得秋字

西園佳會幾名流野色偏多背郭樓汾上雨晴還駐馬
白雲一片寫清秋

暮雨山行感懷

馬首奔流響石灘，亂山風雨送人寒。
別來茅屋常虛榻，却憶南華枕上看。

新鄉城西昔送李學憲于鱗至此感懷

路出新鄉煙樹重，石橋曾別李攀龍。
謾言謝朓驚人句，獨立秦高落鴈峯。

望望崆峒倚赤霄，廣成何日一相邀。
鳳臺月出誰同醉，獨愛秦聲聽玉簫。

薄暮登攀詩興孤奚囊多少大秦珠探奇不盡仍呼酒
自信精華絕代無

文旌西去感秋風漢代豪華祇廢宮靜夜搜奇心自遠
千年寶氣有無中

大道相攜五嶽遊老夫共爾賦高秋
瞻將石髓換仙骨
西指崑崙天盡頭

洛城西送別紀明府貞甫

送別西郊車馬行亂山深處隱孤城
黃花潭上秋將老

獨採餘芳寄遠情

杜預墓

夜觀左史日談兵
勲業仍兼著述名
石馬無蹤神爽在
滿天霜月照佳城

杜甫墓

洞庭昔返楚天魂
孤塚千年失子孫
蜀道悲歌今不見
暮雲愁色滿中原

望嵩峯漫題

嵩峯欲賦客徘徊野菊餘花石上開何處青山不秋色
白雲有意傍人來

嵩陽書院觀碑憶李憲副元樹

一到嵩山感故情巍然碑石見題名當時若賦陽春調
獨立中原和楚聲

懶揮楚賦靜心神李白知誰是後身試問漢時三柏樹
有靈曾閱幾詩人

達摩洞

心空面壁古來聞五乳峯頭自落曛欲問無生渺何處
西歸葱嶺萬重雲

登封道中值雨

山雨生寒接遠煙水中亂石綠苔鮮幾家茅屋疎林外
雞犬無聲薄暮天

九月晦夜少林寺對雪

山房宿雀靜簷牙月盡空林忽凍花三十六峯今夜雪
併將寒色照禪家

晚至白馬寺登毘盧閣望洛陽安國禪院

雪晴山閣冷侵衣
西望平林暮鳥歸
驚嶺雲霞空裏色
洛城金界共餘暉

獨步明月山因覩荒涼遂沮遊興


荒山白草路盤盤
却憶仙家倚石欄
落日疎煙秋色好
玉清閣上幾回看

西園為南菴翁題

黯淡雲低竹石間
奚童斲笋踏泥還
菜花春老西園雨

金史卷之二十一
盡日亭臺燕子閒

卷十



四溟集卷十